

AKASHVANI AIZAWL

REGIONAL NEWS UNIT



MNF

MNF Legal Board chuan vawiin chawhma khan Chief Secretary Pu Khilli Ram Meena, chief vigilance officer ni bawk hnenah Indian Air Force (IAF) tana Lengpui ram lei chungchang CBI chhuitir turin an ngen.

An Vice Chairman Pu Lalpianfela Chawngthu hminga lehkha an thehluk-ah hian MNF Legal Board chuan IAF tana Lengpui rama mimal ram lak danah thil felhlel bakah tun sorkara thuneitu sangte'n pawisa tam tham tak an eiru a puhin CBI chhuitir ngei turin an phut a. Tun sorkar ding lai-in kum 2023 December ni 23 a CBI te a tul ang ang chhui thei tura thuneihna (general consent) a pek chu kum 2024 June ni 27 a a hnukhir leh tak avangin CBI-te koh luh hi an ngen tih an lehkha thelhuhah chuan an tarlang a. CBI kher chhui an ngiatna chhan sawifiahin he thilah hian Chief Minister, Revenue Minister, sorkar officer lian leh politics a thiltithei mimal engemaw zat an inhnamhnawih ni a puhna a awm avangin Mizoram sorkar hnuai a thawkte chhui mai chi ni lova an ngaih thu an tarlang bawk a ni.

MNF Legal Board chuan Lengpui rama mimal ram lakna atana cheng vaibelchhe 188 zet mipui sum hman a nih chungchangah hian tihdan phung felhlel satliah ni lovin tum lawk sa reng leh politics thuneihna hmanga inthuruala dik lo taka thuneihna hman sualna ni-in an puh a. Ram lak a nih dan phung hrim hrimah hian ram lakna dan hman lai Right to Fair Compensation and Transparency in Land Acquisition, Rehabilitation and Resettlement Act, 2013 (RFCTLARR Act) chu namnul a bawhchhiat a nih thu an ziaak bawk a. Dan dinglai palzutna langsar tak tak a tam bakah, ram lak hna chu a bul tanna, Preliminary Notification tih chhuah atanga ni 70 chhung lekin engkim zawhfel vek a ni a, hei hi Dan zawm chung chuan thil theih loh tawp tura ngaih a ni a ti a, a buaipuitu Aizawl Bawrhsap Pisa leh sorkar hnathawk dangte chu Dan kalha thilti tur hian sorkar hotu leh mi thiltitheite'n an nawr lui ngei ni a a lan thu an sawi bawk.

Pu Lalpianfela Chawngthu chuan ZPM Media Committee Chairman hminga CBI a FIR thehluk tumna awm ni a sawi chu tlanchhe chung a mipui bum tumna-ah a puh a. Sorkar kalphung pangngai awm sa (proper channel) hmang ngam lova, rorellai party Media Committee Chairman hminga FIR thehluk chu thil kalphung a ni lo a t., CBI chhuitir tumna tak tak ai-in politics thil taka hmai phihfai tumna mai-ah a puh. ZPM sorkar hian MNF Legal Board lehkha thehluk hi bawhzuiin, sorkar kalphung pangngai (proper channel) ngeia CBI te kuta a hlan an beisei a, an umzui zel dawn niin a sawi bawk.

(Desk/PTC Aizawl)



ASSEMBLY SESSION

Tun thla ni 17 atanga tan tur Assembly budget session-ah chuan February ni 19 (Ningani) khian Finance changtu Chief Minister Pu Lalduhoma'n tangka kum thar (2026-2027) atana Mizoram sum ruahman (Annual Budget) a pharh dawn.

Vawiina Assembly inkhawm hun hman dan tur duangtu, Speaker Pu Lalbiakzama kaihruai Business Advisory Committee (BAC) thukhawm chuan budget session hun hman dan tur tlangpui an duang a. BAC duan dan chuan Pu Lalduhoma'n a vawi 3-na atan Mizoram budget chu February ni 19 khian a pharh ang a, a kar leh February ni 23 leh 24-ah a tlangpui a budget sawiho a ni ang. Budget session ni March ni 12 thleng awh tura ruahman chhin a ni. Assembly inkhawm tan ni February ni 17 chawhma dar 10 leh a chanve-ah larsap Gen. Vijay Kumar Singh chuan kum khata inkhawm hmasa bera tihdan pangngai-in Assembly House chhungah thu a sawi ang a, sorkar hnathawh tawh leh hmachhawpte a sawi ang. Hemi hnu hian larsap thusawi chungaw lawmthu sawina motion pulutin a tuk February ni 18-ah sawiho a ni ang.

Tun thlengin sorkar atangin dan dinglai siamthatna tur (amendment bill) 5 a lut tawh a. House chhunga chhan chi zawhna (starred question) 749 leh zawhna ziaka chhan chi 287 a lut tawh baw a, a la luh belh mek zel baw a ni. Tun tum Assembly pakuana thutkhawm vawi rukna-ah hian mitthi sun tur an awm rih lo niin Assembly Secretariat official-te chuan an sawi a ni.



BIRTHS & DEATHS

Nikum January atanga December thla chhung khan Mizoramah nau piang 21,873 leh mitthi 8,080 an awm. Nau piang zinga za zela 50 point 64 hi mipa niin, hmeichhia aiin an tam zawk a, hetih rual hian mitthi zinga za zela 64 point 15 hi mipa an ni thung.

Economics & Statistics department-in thingtlang (rural) registration unit 633 leh khawpui (urban) registration unit 290 atanga thla tina thi leh piang zat (vital report) an dawn danin, nikum January leh December inkar chhung khan Mizoramah nau piang 21,873 an awm a, mipa 11,076 leh hmeichhia 10,797 niin, mipa nau piang hi 279-in an tam zawk a ni. Nikum chhung vek khan Economics & Statistics department hian Mizoramah mitthi 8,080 a chhinchhiah a, mitthite hi mipa 5,183 leh hmeichhia 2,897 niin, hmeichhe thi zat aia mipa thi zat tamna hi 2,286 a ni baw.

Kum 1 hnuai lam thi hi nikumah khan mipa 129 leh hmeichhia 106 chhinchhiah niin, an vaiin 235 an ni a; kum 1-5 inkar thi mipa 26 leh hmeichhia 20 bakah, thi saa nau piang 115 an awm a, mipa 65 leh hmeichhia 50 an ni.

Piang leh thi zatah hian nikum chhung khan mipa thi zat (5,183) aia piang zat (11,076) tamna hi 5,893 a nih laiin, hmeichhe thi zat (2,897) aia piang zat (10,797) tamna chu 7,900 a ni thung a; Economics & Statistics data atanga a lan dan hi chuan nikum chhung khan piang zat atanga thi zat paih hnuah mipa aiin hmeichhia 2,007-in an tam zawk a ni.

